



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail: tiryimiyim@gmail.com

TAPAK 8

Yangia anidakangma :

Tir Yimiyim

tiryimiyim@aolima

tir yimiyim

TAPAK 7

Shireen Abu Akleh ya
Israel nungeri khaset: UN

Tir election atema
Droupadi Murmu-i nomination file

VOL. XIX NO. 250 (ADOK 250) DIMAPUR KÜPTOKNÜ (SATURDAY) AAMI (JUNE) 25, 2022 ₹ 5.00

COVID-19 Nagaland: 1 dak putet

Kohima, June 24, 2022 (TYO): Nagaland nung Hokolbarnü nisung ka dak COVID-19 aliba putet. Tanü Dimapur nung nisung ka dak COVID-19 putet aser iba nisung züingsema ajak agi 35,505 kümogo.

Tang tashi nung nisung 33,250 taneptsü nguogo aser

COVID nungi taneptsü angubaji 93.65% lir.

Nagaland nung COVID-19 alitsü ako ta temolung melemi bilemba sample 4,74,566 tendangogo. Külén, June 23, 2022 tashi nung COVID-19 vaccine indang dose 18,33,669 agütsüogo.

Assam nunger Deka-i IB Director inyaksü

Guwahati, June 24, 2022 (Agencies): Assam nungi IPS ketdangsür Tapan Kumar Deka-i Intelligence Bureau (IB) Director inyaksü shimogo.

Tapan Kumar Deka-i Arvind Kumar nungi IB Director mapa melenzüktsü. Arvind indang kümsük June 30, 2022 nü tembanger.

Deka ya Assam kübok Barpeta district nungi lir saka pa Tezpur nung dang intet. Pai IB indang operations wing maparen ketdangsüa arur.

Pa küm ana atema IB Director inyaksü, ta Personnel Ministry-i sangdong ka nung metetdaksü.

Deka ya Himachal Pradesh cadre nungi 1988 batch IPS officer lir aser Northeast nungi mezüingbuba Intelligence Bureau

(IB) indang Director asütsü.

Arishi küm 58 tain Deka-i tang IB indang Special Director inyaker aser paisa Jammu and Kashmir nung counter-terror operations in-charge repsema inyaker.

Deka-i Intelligence Bureau of India den mapang talangka inyakogo aser pa ya NSA Ajit Doval den tesentaktep tajung aliba ketdangsür ka lir.

1998 küm pai Intelligence Bureau nung aden aser iba sülen nungi pa police uniform nung kodanga mengudang.

Tapan Kumar Deka-i Physics nung Master's Degree nguteta lir aser pa ya AASU tanishir ka liasü. Pai Indian Police Service (IPS) atema mezüingbuba tatidang agütsüdag takok angu.

Sharad Pawar-i Uddhav Thackeray den ajurutep

New Delhi, June 24, 2022 (Agencies): Nationalist Congress Party (NCP) tanishir Sharad Pawar-i Hokolbarnü Maharashtra Chief Minister Uddhav Thackeray den ajurutep.

Kasa anogo nung Shiv Sena MLA kati Guwahati nung temolung masüba MLA telok nung aden.

Tanü nikongdang Sharad Pawar, Deputy Chief Minister Ajit Pawar, state cabinet minister Jayant Patil aser party lennir Praful Patel nungeri Uddhav Thackeray den par 'Matoshree' kidang ajurutepa senden ka menogo.

"Temolung masüba MLA tem ya party raksatsü merangertem lir. Toktsür aoertem den ni kechiba mepelatsü? Shiv Sena aser Thackeray medeni nenok kodaser tejakleni aotsü" ta Uddhav Thackeray-i party senden ka nung ashi.

Eknath Shinde-i anir party anema inyakba sünemtsü atema Shiv Sena-i MLA pezü disqualification asütsü atema shidi züluogo. Tang tashi nung Shiv Sena-i MLA 16 disqualify asütsü atema asüingdangogo. Parnok ta BJP-i sorkar yimsü asüba Assam nung lir.

Uddhav Thackeray anema noktakba Eknath Shinde-i tanü Guwahati nung hotel toktsür tekülem ki kati ao.

Pa den MLA 50 den tema lir aser parnok 40 tashi Shiv Sena

nungi ta Shinde-i osangbener den jembidang ashi.

Guwahati hotel nung Shiv Sena MLA tem adenertem rongnung Dilip Lande tesüba lir. Eknath Shinde den MLA 50 den teimba akümba akok kechiyong MLA aika Guwahati-i aotsü akok ta osang kar ajanga ashi.

Eknath Shinde den adenba MLA tem nem notices agütsüba sülen parnoki Supreme Court-i aotsü renemer. Eknath Shinde'er telokisa Election Commission dang party aser symbol meshia kuli agütsütsü imlar ta osang ajanga ashi.

Union Minister kati Maharashtra teloktep lennir Sharad Pawar amokmerenogo ta Hokolbarnü Shiv Sena spokesperson Sanjay Raut-i ashi.

"Pa ya Maharashtra jabaso lir. Parnoki pa amokmerener. Modi, Amit Shah nünati angashir na? Nür minister-i Sharad Pawar amokmerener, nünati iba inyakyim pusemer asü koda? Maharashtra-i metetnür" ta Raut-i metetdaksü.

Shinde-i pai aniba telok ya chichiba Shiv Sena lir ta ashir aser pai state Legislative Assembly Deputy Speaker, Governor Bhagat Singh Koshyari aser legislature secretary nunger dangi legislature party leader meshia MLA 37 indang sign adenba shiditem züluogo.

Nagaland nung anentsüh ajanga timtemer: NSDMA

Dimapur, June 24, 2022 (Agencies): Tesüiba anogo ishika tzüinglu kanga aruba ajanga tesem balala nung anentsüh agi gari lenmang, apu aser kiojen aika raksaogo ta Nagaland State Disaster Management of Authority (NSDMA)-i Hokolbarnü metetdaksü.

Tzüinglu kanga aruba ajanga Tening Sub-Division aser Athibung Sub-Division nung anentsüh alua timtemer aser külén Kohima-Leikie road o NEC road anebanga lir.

Subdivision nung lenmang anebanga aliba lapoktsü atema mapa inyakdar ta District Disaster Management Authority Peren-i metetdaksü.

Maneni, public kiojen raksaba, nija kitem raksaba aser yimtsüing aika nung aputem raksaa lir aser iba atema teyari nüngdaker, ta parnokisa ashi.

Noklak district nunga

Panyangan Sector, High School Sector Danlepdong Sector, Nokyan B Village, Nokyan Village, Dem Sector aser Kaongao Sector nunga anentsüh aluba osang angazüker.

Anentsüh aluba tesemtem nungi District Disaster Management Authority-i nisungtem anienba mapa inyaker.

June 21, 2022 aonung anentsüh ajanga Nokhu approach road anebanga ajanga yimtsüing 20-i aoba lenmangtem shibangogo. District Disaster Management Authority (DDMA) Noklak-i lenmangtem lapoktsü atema kanga meranga inyakdar.

Maneni, District Disaster Management Authority (DDMA), Phek-ia Khomi & Pholami road, Chizami, Mesulumi, Meluri, Lozaphuho aser Lanye yimtsüingtem nung anentsüh alua timtemba osang metetdaksüogo. Külén, DDMA Wokha-ia

Chukitong nungi Doyang apulen aoba lenmang nung anentsüh alua aliba ajanga ilenji mesenzütsü osang metetdaksüogo.

HOME COMMISSIONER-I DISASTER STATISTICS SENDENAYONGER:

July 15, 2022 nü State Level Co-ordination Committee (SLCC) on Disaster Statistics senden amentsü ta Home Commissioner, Abhijit Sinha-i sangdong ka nung metetdaksüogo.

Sendenji anepdang 11:00 ako nung Home Commissioner indang Office nung amentsü aser State o District level indang Disaster Data den Nagaland indang Disaster Statistics renemtsü, ta Abhijit Sinha-i ashi.

Iba senden nung committee züingsem ajak den Disaster Management atema Nodal Officer adentsü tuyur, ta Home Commissioner-i isa metetdaksüogo.

Assam Congress-i Shinde dang state toktsür oang ta ashi

Guwahati, June 24, 2022 (Agencies): Hokolbarnü Assam unit Congress züingsemtemi Shiv Sena lennir Eknath Shinde aser Maharashtra MLA tem anenzüka aliba hotel kima lungkak ait.

"Assam nung tüzümettsüing timtem tulu ajurua lir anungji nenok oadokang" ta Congress züingsemtemi yimiyim ayima lungkak ait.

Assam Congress president Bhupen Bora-ia Eknath Shinde dangi shidi ka züluba nung 'iba ama tensa tamajung ka nung nenok aruba ajanga state tenüing menüksüogo' ta shia lir.

"Maharashtra sorkar atsüingdoksü atema nenok Shiv Sena MLA tem Guwahati hotel nung arua amongba aser iba osang media nung prokshiba ya

Assam nungeri magizüker. Nenok yangi aruba ajanga Assam tenüing menüksüogo" ta Assam Congress president-i züluba shidi nung shia lir.

BJP sorkari Shinde yariba ajanga Assam aser nübertem tenüing menüksür, ta Bora-isa ashi.

Tüzümettsüing agi timtemertemi teyari shitak mangur aser state nung tensa kanga mejungi lir. Saka nenok yangi arua amongba aser state sorkari nenok chuba ama anepaluba ya kanga dang tim masü aser magizüker, ta paisa Eknath Shinde dang ashi.

Assam nungi politics nung takotet nisungtem adokogo saka tanü Chief Minister Himanta Biswa Sarma-i pa ya sorkar

loksatsü ajungmesor ka ama kuli sayuogo, ta Bora-isa metetdaksü.

Sarma aser par sorkari tüzümettsüing atema mazüing inyaksüba sernung party nung temolung masüba MLA tem aruba ajanga iba mapa nung tetsükdaksü agütsür ta paisa shisem.

"Nenoki Assam aser nübertem nem tenüing menük bentsür aruogo anungji nenok tekaratiba nung Assam toktsür oadokang ta ni ashir. Iba ya ozü state ajungtsü atema lir" ta Bora-isa Shinde dang ashi.

Eknath Shinde aser tanga Maharashtra MLA tem Bodbarneep Surat nungi aruba sülen Guwahati nung hotel ka nung anenzüka amonger.

IAS peria maliba atema Mizoram sorkari UPSC coaching agütsür

Aizawl, June 24, 2022 (Agencies): Mizoram nung 'Super IAS 40' programme atema candidates 500 temai entrance test agütsüogo.

Iba sentong ya Mizoram state sorkari tenzüker aser UPSC civil services examination nung nisung 40 coaching atema yaritsü.

Mizoram nung IAS officers agi meperiba ajanga state sorkari UPSC agütsünür nisung 40 tashi coaching nung yariteptsü.

Sorkari agiba entrance test nung takok angurtemi Delhi nung reju tajungtem nung coaching agitsü aser iba indang senji state sorkari agütsütsü.

Mizoram Youth Commission (MYC)-i iba mapa inyakba ketdangsüa repranger.

Candidate 575-i entrance test agütsütsü atema tenüing agüja lir,

ta MYC chairman aser MLA Vanlaltanpuia-i ashi.

Mizoram aser Delhi nung centre 5 nung iba tatidang agiogo. June 27, 2022 nü results adoktsü aser iba sülen June 28 o June 29 anogotem personal interviews agitsü aser iba nunggi ajemdaker July 1, 2022 nü teshimteter osang metetdaksütsü.

Written test nung 50% angurtem personal interview atema shimtsü. Coaching atema shimba kaketshirtemi UPSC prelims anabosa magütsü tashi Centre mesüra state sorkari agiba competitive exams kecha nunga shilem magütsü, ta Vanlaltanpuia-i metetdaksü.

MYC-i parnok reprangtsü aser parnok dak temolung masüba ajitetra sorkari parnok yariba anentsü mesüra sen agütsüba meyipa meshitsü ta

paisa ashi.

Iba sentong kübok sorkari UPSC agütsünür nisung 40 nem Delhi nung aliba Vajiram & Ravi, Vision IAS aser ALS IAS nung coaching agitsü atema 1-year full sponsorship agütsütsü.

Mizoram sorkari 2020-2021 nung 'Super IAS 20' programme tenzüka liasü. Delhi nung ita trok crash course nung kaketshirtem yaritsü atema iba sentong agi saka kaketshir shingia 2021 atema civil service exams magütsü.

India nung azüingtsü-zülütsü metetba state tanabuba süaka Mizoram nungi IAS officers aika madoker.

Mizoram nungi tatemsabuba UPSC tatidang nung takok angurji Grace Lalrindiki Pachuau lir. La ya taoba chief secretary Vanhela Pachuau'er jala lir aser lai 2014 küm IAS ketdangsür aküm.

Lipajen wazüka ayutsü atema Kohima nung sentong ka agi

Dimapur, Aami/June 24 (TYO): Forest aser Police Personnel pur atema "Biodiversity Conservation and Combating Wildlife Crimes" onük nung ajemdaker shisa agütsüba sentong ka Conference Hall, Forest Offices Complex, Kohima nung June 23, 2022 nü ayongzüka liasü. Iba sentong nung Forest Department aser Police Department nungi ketdangsür 50 dak tema dena liasü.

Iba sentong ya Department of Environment, Forests and Climate Change, Nagaland State Biodiversity Board aser Aaranyak, Guwahati lungjemer ayongzüka liasü.

S.P. Tripathi, Chairman Nagaland State Biodiversity Board ajanga iba sentong teratet ashi aser Bijoy Sankar Bora, Senior Consultant, Aaranyak ajanga par telok tenung nung jembia liasü.

Sentong nung alakteta jaoker M. Senthil Kumar, IFS, CCF (M&E) ajanga jembiba mapang Aaranyak aser Forest Department and Biodiversity Board ajanga iba ama sentong tajung ayongzüka atema pelaba lemsatapa liasü.

Lipajen wazüka ayutsü onük ya tematiba nungi yimtsüng sasep tashinung awareness agütsütsü nungdaker aser arem shiruru aser takumsangnu anema mapa tamajung inyakba anendaktsüba maparen inyakba ya tajangzük aliba ka asütsü imla atar, ta pai ashi.

Sr. SP, Kohima aser tetushi tesemdanger Kevithuto Sophie, IPS ajanga lokti tentet balalai shilem agütsü indang jembia aser arem aser yangji aliba takumsangnu azioktsü

aser lipajen wazüka ayutsü ayongzüka liasü.

PCCF & Chief Wildlife Warden and HoFF, Nagaland (Retired), Satya Prakash Tripathi ajanga iba sentong teratet tongmelang agi lemsatap aser Nagaland nung 'wildlife crime' jengang indang jembia liasü.

Lipajen wazüka ayuba aser wildlife crimes aziokba nung temolung agütsütsü kanga tongtipang lir, ta paia ashi.

Secretary-General aser CEO, Aaranyak, Bibhav Kumar Talukdar ajanga yokba osang ka iba sentong nung zünga liasü.

Senior Consultant, Aaranyak, Bijay Sankar Bora ajanga Aaranyak Organisation indang rateta ashi aser CCF & Member Secretary, NSBB, Spongngukshi, IFS ajanga melepzüng o jembia liasü.

Technical Session mapang FRO, NSBB, Savinuo Kikhi-i Biodiversity Act, 2002 aser Nagaland State Biodiversity Rules, 2012 indang PowerPoint presentation ka agütsü liasü.

Iba mapang lai Biodiversity Act, 2002 indang tzüzüng-ozüngtem rateta ashi aser Nagaland nung iba Act mapa kuma inyakba jengang lemsatapa liasü.

Senior Manager, Aaranyak, Dr. Jimmy Borah ajanga "Overview of Wildlife Crimes focusing on rhino and tigers at the global and regional level" aser "Identification and Understanding commonly used wildlife products in the region" onük nung ajemdaker PowerPoint presentation ka agütsü.

Project Officer, Aranyak, Ivy Farheen Hussain-i

"Wildlife Crimes on rhino and tigers at the local level" aser region nung kanga bulua inyakba wildlife crimes nükjindong indang PowerPoint presentation agütsü liasü.

Laisa Aaranyak indang DETERS Initiative indang onük nung jembia aser wildlife crime anema raraba nung lokti tentet balala shilem indang angatetdaksü.

Chairman, Nagaland State Biodiversity Board, S.P. Tripathi ajanga Nagaland nung wildlife crime indang jengang metetdaksa liasü.

Iba senden nung shilem agirtemi memetetbatem angatetjema asüngdangya süa liasü.

Tarutsü anogotem nunga Forest aser Police personnel atema iba amala sentong ya ayongzüka agütsü aser yimtsüng level nung arem, arem shiruru aser lipajen wazüka ayutsü indang awareness agütsütsü nungdak, ta parnoki jembia liasü.

Nagaland Forest Department, the Nagaland Police Department, NSBB, WCCB, MOEF&CC, GoI, Aranyak, the WCS- India aser ano agency balalai nürburtem nem arem, yangji aliba takumsangnu aser lipajen wazüka ayutsü atema maparen balala inyaktsüla, ta parnoki angatet.

Iba sentong nung DFO, Kohima Forest Division, Raj Kumar M, IFS menden liasü. Conservator of Forest & Member Secretary, Nagaland Pollution Control Board, K. Hukato Chishi, IFS ajanga tarur pela agizükba o jembia aser Consultant, NSBB ajanga melepzüng o jembia sentong tembang.



Chuchuyimlang Kaketshir Telongjem Dimapur ajanga June 23, 2022 nikongdang 5:00 ako nung "Kü Mera Chuchuyimlang" nungja agütsür documentary video sayaba sentong ka Kohong Sängki Multipurpose Hall, Near District Court Complex, Dimapur nung agia liasü. Iba sentong nung alakteta jaoker Nuklutoshi Longkumer, Ex-Minister, Government of Nagaland liasü aser Temsü Jamir, Pastor, Aoyimti Baptist Arogo ajanga iba documentary video meshiteta sarasademtsü. Iba video nung Chuchuyimlang yimdak tebor tajung aser tongtipang tesemtem sayur aser kasa mapang tepang o agi rateta ashir. Iba documentary video Director Moameren, Production Manager Moaakum Jamir, Editor Akumyanger, Script Obangtemsu, Narrator Moajungla & Benjongsola, OST Imnasanen & Esther Jamir aser Subtitle Moasenla alitsü.

Watsü Mungdang-i Aotsür data bendentsü asoshi sentong ayongzük

Dimapur, Aami/June 24 (TYO): Nagaland alema orr tesem balala nung mapa inyaka aser meiyaki aliba Aotsür data bendentsü atema Watsü Mungdang ajanga parnok kübok telen (unit) ajak den shisatokden sentong ka June 24, 2022 nü agia liasü.

Iba mapang tetsürtem, talisa lanutsür kumzüka ayutsü nükjindong nung jila aser yimtsüng balala nungi unit ajak nem Nagaland alema azüngtsü aser mapa bushie aoba tetsürtem indang record junga anepalutsü mapa nunglokja liasü.

CEO Nagaland ajanga metetdaksür

Dimapur, Aami/June 24 (TYO): Nagaland Legislative Assembly atema 2023 küm General Election agütsü aliba atema Election Commission of India ajanga Nagaland nung aliba Deputy Commissioners & District Election Officers (DEOs) ajak Face to Face Training programme agütsü metetdaksüogo, ta Chief Electoral Officer, Nagaland, V. Shashank Shekhar, IAS ajanga sangdong ka nung metetdaksü.

India International Institute of Democracy and Election Management (IIIDEM)/ Election Commission of India nungi shisalen sayur nisung 9-i iba training ya agütsütsü.

Training ya June 29 aser 30, 2022 anogotem Commissioner

Iba sentong nung Watsü Mungdang tir Arenla Longkumer menden liasü aser Mapujungla, advocate ajanga temzüng-ozüng tsütsü tetsür temeden indang jembia aser T Arenla Longkumer ajanga "Women's Safety" onük nung jembia liasü.

Sentong nung Asola Ozukum, tatong tir, Watsü Mungdang aser Moatola, repsem zülur, Watsü Mungdang ajanga o tatsütsü jembia liasü.

Maneni Sungtiriben, tongti zülur, Watsü Mungdang ajanga metetpela mapang agia liasü.

Office, Nagaland indang Conference Hall nung agütsü sentong lir aser iba sentong ya Chief Electoral Officer, Nagaland, V. Shashank Shekhar, IAS ajanga semzüksütsü.

Iba training mapang Law & Order, Media Certification and Monitoring Committee (MCMC) & Paid News, District Election Management Plan (DEMP)/Booth Level Election Management Plan(BEMP), Vulnerability Mapping, IT applications, Systematic Voters Education and Electoral Participation (SVEEP), Model Code of Conduct, Expenditure Monitoring aser Accounts on Election Expenditure onüktem awajemtsü, ta sangdong ajanga ashi.

Mokokchung nung teintet rogo aser matamabensar asadangtsü

Dimapur, Aami/June 24 (TYO): Ministry of Social Justice & Empowerment, Department of Empowerment of Persons with Disabilities (Divyangjan) ajanga tuyuba ama Rashtriya Vayoshree Yojan (Teintet rogote atema) aser Assistance to Disabled Persons of Purchase (ADIP) Schemes kübok ALIMCO ajanga teyari agütsütsü asoshi Assessment Camp tem tsünglanglen agütsü aliba anogo aser tesem nung agütsü, ta Deputy Commissioner, Mokokchung ajanga sangdong ka nung metetdaksü.

July 5, 2022 nü IMDH, Mokokchung nung anepdang 10:00 ako nungi alitsü, July 6, 2022 nü CHC, Mangkolemba nung anepdang 10:00 ako nungi alitsü, July 7, 2022 nü CHC, Changtongya nung anepdang 10:00 ako nungi alitsü aser July 8, 2022 nü CHC, Tuli nung anepdang 10:00 ako nungi alitsü.

Assessment Camp aliba anogo nung teyari agütsüpur temi item kuli kaket (documents) ya sayutsüla.

Rashtriya Vayoshree Yojna (Teintet rogotem) asoshi Passport Size Photo, arishi küm & telidak tesem indang kuli (AADHAR Card/Voter ID) mesüra Government ID Card mashi indang Photo Copy.

Gazette Officer ashi kati agütsüba income certificate (Ita nung sen 15000 mesüra tekübok).

IGNOAPS kübok Old Age Pension agiba mesüra BPL Categories atema danga state mashi nungi Government Pension agiba kuli Photo Copy.

Assistance to Disabled Pensions for purchase (ADIP) schemes atema

matamabensaba sayuba Passport Size photo, arishi küm & telidak tesem indang kuli (AADHAR Card/Voter ID) mesüra Government ID Card mashi indang Photo Copy.

Gazette Officer ashi kati agütsüba income certificate (Ita nung sen 15000 mesüra tekübok).

Matamabensaba shilem 40 mesüra tali aliba indang Disability certificate.

Assam CM-i Maharashtra MLA tem dang 'tourists' ajar



Hokolbarnü Assam unit Congress züngsemtemi Guwahati nung aliba luxury hotel kima lungkak aitba angur. Iba hotel nung Shiv Sena lennir Eknath Shinde aser tanga Maharashtra MLA tem anenzüka lir aser Congress züngsemtemi parnok dang Assam nung tzümetsüng timtem tulu ajurua timtemer anungji state toktsür oadokang ta takhangba agütsü. Assam Congress president Bhupen Bora-i Eknath Shinde dang parnok arua anenzükba ajanga state tenüng menüksüogo ta shidi ka zülu. (Guwahati, June 24)

Guwahati, June 24, 2022

(Agencies): Maharashtra nungi temolung masüba Shiv Sena MLA tem Guwahati nung arua anenzükba atema Assam Chief Minister Himanta Biswa Sarma-i pa shilem kecha mali ta sayua "tourists" ajak pelashishia agizüker ta metetdaksüogo. Maharashtra indang politics nung pai shilem kecha magir ta CM Sarma-isa ashi. Maharashtra nung Uddhav Thackeray-i aniba sorkar loksatsüsa tia ka ajurua lir kechiyong Thackeray'er Shiv Sena MLA 38 tashi Guwahati nung arua jenoka lir. "Nisung kar Assam-i aru. Parnoki hotels booked süogo. Iba atemaji ni pelar. Nenoka arungma aser iba jai Assam indang rongsenketzüng

yaritsü. Iba ajanga Assam tourism ajungketer" ta Sarma-i ashi. "Ni Maharashtra atema kodaser jembitsü. Iba ya state tulu ka lir. Nisungtemi Assam nung arua anenzüksü shimba atema ni pelar" ta paisa ashi. Assam nung BJP-i aniba sorkari tzümetsüng indang relief maparen meinyaker aser Maharashtra nungi MLA tem anepalur ta tai tongloksüba atema "Assam kübok tesem kar nung tzümetsüng timtem ajuruba atema ni hotel ajak shibangang ta tetuyuba magütsütetsü" ta CM Sarma-i ashi. "Onoki tourism ajungkettüsü atema sen aika endokogo, onoki Kamakhya, Kaziranga semdangang ta ashir, süra Assam-i arurtem ni noktangtsü

asü?" ta paisa asügang. Assam nung Shiv Sena MLA tem kechiba shibanger ayur? ta osangbeneri asügangdang "Kodaser shibanga ayur? Parnok hotel nung lir. Parnok pela dang amonger. Parnok ya ozü ainertem lir" ta Sarma-isa langzü. West Bengal Chief Minister Mamata Banerjee-i Maharashtra MLA tem lar state-i arutsüla ta ashiba atema asügangdang "Banerjee-i Assam-i aruba Lakshmi anir onür" ta paisa ashi. "Tourism nung Assam aser Bengal tsüngda teti tokteper. Mamata-i ozü dangi aruba 'Lakshmi' anir onür. Parnok Bengal-i ora Bengal-i GST angutsü" ta Sarma-isa metetdaksü.

ED-i ex-managing director ka apu

Guwahati, June 24, 2022
(Agencies): Assam nung Industrial Cooperative Bank Ltd nung taoba managing director ka Enforcement Directorate-i puogo. Iba nisung ya Subhra Jyoti Bharali lir aser pa ya June 22, 2022 nü apu aser Brihostibarnü Guwahati nung aliba Prevention of Money Laundering Act (PMLA) court kati anir ao, ta ED-i ashi.



Industrial Cooperative Bank Ltd. nung taoba MD ya anogo tenet tashi ED ket nung ayutsü okadaki temelaba agütsüogo. Subhra Jyoti Bharali ya sen tim mesüi amshiba ken o nung tai tonglojka lir aser PMLA bushisügangdang nung pai amalitep maliasü.

Bharali-i managing director inyakdang bank indang sen Rs 9.51 crore tashi agi. Pai bank indang payment collectors aser field executives asoshi travelling allowance ta tiyazü kulikakettem agüja senji miimzüka agi. Bharali anema ken o ya Guwahati Police (Panbazar police station) nung benoka lir.



23 Sector Assam indang Serchhip Battalion-i Mizoram kübok Zokhawthar nung Rs 1 lakhs alang Methamphetamine Tablets apu. Sepaitemi 51,000 vials nung mozü seret 4.750 shi apu aser iba dak sendakba nung nisung asem Myanmar nunger Chinsuanlang aser Mizo nunger Lianzama o Lalkrosaiawrg na apu. (Aizawl, June 24)

Meghalaya sorkari ozüngi memelaba toll gates shibangtsü tuyur

Shillong, June 24, 2022

(Agencies): Meghalaya sorkari Autonomous District Councils (ADCs) ajak dang National Highways (NH) aser State Highways (SH) nung toll gates lapoka aliba shibangtsü tetuyuba agütsüogo. Governor Satya Pal Malik-i tan ita tetenzüklen Chief Minister Conrad K Sangma den ADCs dak sendakba onüktem lemsatapa liasü. ADCs-i Utilization Certificates (UCs) magütsüba

asor NHs o SHs nung parnoki ozüngi memelaba toll gates lapoka aliba shibangtsü atema Governor-i ashi. Chief Minister Conrad Sangma-i Khasi Hills Autonomous District Council (KHADC) aser Jaintia Hills Autonomous District Council (JHADC) den senden amendang tetuyuba agütsüogo, ta District Council Affairs (DCA) Minister Lakhmen Rymbui-i ashi. "ADCs-i pei pei telongtet

nung tax saruba atema state sorkari mashishir saka NH aser state highways nung toll gates lapoktsü tashi mali ta onoki shiogo" ta Rymbui-i ashi. "Onoki Councils dang tangsa toll gates shibangtsü tetuyuba agütsü aser JHADC o KHADC ketdangpurtemia molunga agizükogo" ta paisa shisem. ADCs-i kodang nungi toll gates lapoka arur iba indang kulikakettem mali, ta Minister Rymbui-isa metetdaksü.

Manipur nung aayanger 1 kahset; 1 yirutsü

Imphal, June 24, 2022

(Agencies): Manipur kübok Kakching district nung mejangjatetba nisungtemi tangalen nungi aayangi arur ka khaset aser ka yirutsü. Iba lendong ya Brihostibar nikongdang 6:45 ako meta Kakching Wairi Leishangthem Pareng nung atalok, ta police-i ashi. Tasüsangji Madan Yadav (30) aser Bharat Yadav (35) yirua alisangji ta jangaogo. Tenaprong ya Bihar kübok West Champaran district nungi lir.

Mejangjatetba nisung anati prangpong bener para ki dangi atu aser idakji tangalen nungi aayangi arur nisung 6 liasü. Tenati parnok dak injang khaloktsü aser idangji ka khaset aser ka kanga mejungi yirutsü ta police-i metetdaksü. Iba lendong nung yirurji Jeevan Hospital-i anir ao aser iba sülen RIMS, Imphal-i anir ogo ta parnokisa ashi. Iba osang angashili mobile forensic unit telok ka aser police tesem tonga oa bushisügangdango.



Agnipath Scheme anema lungkak aitba mapang ka nung Meghalaya nung Indian Army inyaknürtemi Shillong nung lungkak aitba sentong ka ayongzüka agiba angur. Centre sorkari Common Entrance Exam (CEE) magiba atema Meghalaya kübok district balala nungi lanurtemi public rally ka agiba sülen Shillong Civil Hospital jakdang mener lungkak ait. (Shillong, June 24)

Arunachal nung NSCN-IM züngsem 2 apu

Itanagar, June 24, 2022

(Agencies): Arunachal Pradesh kübok Changlang district nung NSCN-IM züngsem ana puogo. Police aser Assam Rifles külem telok kati Kongsan nunger Baitu Youngja (51) apu. NSCN-IM-i tuyuba ama pai Rangkatu tea garden indang manager dang sen meshitsü atema ao, Superintendent of Police Mihin Gambo-i ashi. Bodbarnü police, Assam Rifles aser CRPF külem telok

kati NSCN-IM züngsem ka apu. Iba nisung ya Phangsum nunger Chakngam Kongkang (30) ta jangaogo aser pai tea garden nung tashiyim agi sen meshitsü atema ao, ta Mihin Gambo-isa ashi. Pa ket nungi motorcycle aser mobile phone ka puogo. Parnoki tea garden nungi Rs 2 lakh meshi. Iba dak sendakba nung ken o ka benokogo aser bushisügangdang südar, ta police-i metetdaksü.



TIR YIMYIM YIMOBILEM (EDITORIAL)

DIMAPUR

KÜPTOKNÜ

AAMI 25, 2022

Yi ayokba agi tanur züngdaksütsü na ?

Nagaland nung yi yanglua ayoktsüla aser iba nung jagi government dangi aruba alimelen sen agi government school nung azüngerterem yaritsüla ta, tangari masü, School Education department nung advisor-bai ashiba o ji meimlaba aser kanga mapetba o ka lir. Nagaland nung yi meyanglutsü aser mayoktsü ozüng zünga liaka takok ngua mamshitetba agi, yi ya menokdangang tajungba ta aikati jembir. Atangji, yi ya temesepba chiyongtsü, anungji tajungbo masü. Iba jagi shinga tsüraburi pei chirnurtem dang yi ajemtsü majungshir. Ajisüaka, yi meyanglutsü aser mayoktsü ozüng zünga aliba takok ngua meinyaktetba ya takok ngua inyadaksütsüsa yariteptsü melen, tamakok anguba tenüng nung Nagaland nung yi yanglutsü aser ayoktsü melatsüla ta bilemba tangatetbajibo, government school-tem ya anepaludangyonga majunger, anungji ajak shibangang ta asüba amato ka asütsü. Ashiko, Nagaland nung yi yanglua yokdaksünüba ya jenjang dalang agi yi tajung jemnüba agi asütsüa akok, tejemner asoshibo aji shitak, saka asenok taintem jenjang dalang agi yi tajung ajemba agi asen chirnurtem tajung küma manitetsü. Yi ajem tenzükba ya anguba agi tenzükba lir, anungji yi agi taküm raksar ta angatetra, asen kidang dang masü saka asenk kiyong aser asen yimti aser asen lima nung yi mangutsüla. Atangji, asen lima nung yi nokdangaka, tajemberbosa lir asünungji, ozüng alema yi yanglur aser yi ayoker aika adoka lir. Aji oda, talubosa manguba temesepba chiyongtsü ayoker asünungji, jenjang tasak agi ayoker saka tajemertemibo odang alia ajemer, anungji yi ayoker aika takar küma alitsü. Ashiko, item yi ayokertem jagibo yi meyanglutsü aser mayoktsü ozüng ya takangba-ang yangludaksünüba alitsüa akok, kechiyong, kanga tia maka, parnok asoshibo yi ayokbajiang taküm lenmang kümogo. Alima nung shir kibong südirsüaka, kibong mesütsü aser taküm lia aotsü atema mapa kabosa inyaksüla aser iba mapaji ozüngi melaba aser Tsüngremi mulungba mapa asütsübaji kanga tongtibang lir. Ajisüaka, yi yoka kibong mesüba mapa dang masü saka nisung aikati ochimashi aser tashiyim amshia inyakba nungi anguba sen agi kibong mesür aser karbo pei mang yoka kibong mesüba purtema lir. Itemji asenoki jangratema bilemer asü ? Yi ayoktsü asü mayoktsü ta asübaji asenokbo government nung alirtem nem yutsüdi, saka yi ayokba nung aruba sen agi asen chirnurtem school züngdaksütsübo mebilemli. Yi mayokyonga, alima meimchirtem chia ajemba chiyongtsü aser taküm nungdak aika lir, anungji item rongnungji ka yoka kibong anepalutetsü aser loktiliba nung tsüraburtema aser chirnurtema nümadanga litetsü. Alima nung rongsen aika bendena takar akümba ya tongtibang masü aser yimten nung tulur küma menden tajung ka nung amenbajia masü, saka pei mapa agi, pei kibong agi, pei tsürabur agi aser pei chirnurtem agi nisung ka loktiliba nung nümadangteta alibajiang tongtibang aser takümüji jangratema alir. Aji oda, Naga nung jala jabasotembo yi ayokba agidang kaketreju anepalua züngdaksü nung dang, government school junga akümtsü ta School Education department nung walunisangi bilembaji, ano khen ajaki jungjunga bilemdangtsü junger. Nagaland nung government school majungba ya senotsü meperiba agi masü saka ketdangser aser tesayur tajung agi meperiba ajanga lir. Tazüngtsübo Nagaland nung government school tesayurtem agir magima aser government school asoshi center nungi yokba sen agi Delhi nung Aam Aadami Party government-i yangluba ama 'International school' mesüka yanglutetsüsa yoker. Ajisüaka, Nagaland nung government school ki aika talaor lir aser government school nung azüngerterem nem aküm magütsütetter. Iba ama tia ka nung Nagaland government school nung sayur tesayurtem aser azünger kaketshirtem pei mapa aser pei kaketreju agi aküm angutsüsa inyaksübaji, yi ayokba sen agi masü saka asen akaba sempet aser asenok nem Delhi nungi agütsüba sen ajak ochishia amshiba agidang tongtettsü. Yi ayokba sen nungi aruba alimelen agi langka tajung inyaksü bilemra, ajibo yi ajemba agi shirangertem aser balalulartem yariba nung amshitsü bilemstüla.

OLEMSABANG

Tasüngtet Lokti Yimden

Wati Longchar

(Yashi adok nungi...)

- d) Muslim pur ya telok tila (minority) rongnung nübu teimba asünungji, ozüng balala ajanga aser tashiyim mapa aika ajanga azüoka ayutsü meranger. Tat. agi, CAA (or CAB) ajanga temeküt linüktem - Bangladesh, Pakistan, Afghanistan nungi rishikangshi asüba ajanga Hindu, Jain, Buddhist, Christian aser Sikh küm trok tejaklen nungi Indiai arua alir, parnok India senso kümdaksütsü melar. Muslim nungerberbo iba nungji maden. Tetezü, Muslim nütsüng zünra ta asüba tsübuba lir ta sayur. March 24, 1971 sülen Bangladesh nungi India nung arua alir parnok, India senso nung mezüngoktsü ta ozüng yangluba anema telok balala aikati ola adokogo. CAA anema longkak aيتدang Jamia Millia Islamic University nung student dak azükba, aser Delhi nung Hindu nungertemi Muslim kiyong nung mi senoktsüba ajanga rongsen crores aika jenjang arongba aser nisung 13 tashi tepsetba osang nguogo. Muslim ajema kümdaksütsü, tsübudaksütsü aser jena odaksütsü aser India Hindu nation kümdaksütsü nükjidong nung inyaker ta shisarajemer aikati shiogo. CAA ya temzüng küma inyaka ao nungbo North East India nung lisopur tajemba akümtsü ta tetsübu o jembiba mapang, MP Shri Tokheho aser CM Rio-i Article 371Ai Naga nungerberbo kümzüksü, shisa bulutsü mali ta BJP-i aniba Govt. phuküm ola agütsüogo. Kechiba Naga nung leniri aroka masadangi, ibala oji jemi ta yimden lenir aser tazünger aikati mepelaba o jembia arudagi.
- e) Tanga yimsü mamangdaksütsü asoshi anti-conversion law state toku tashi nung yanglua Khristan aika rishikangshi ajurua arudagi. Mapang tatsüka tsüngda nung state aika nung anti-conversion law yangluyonga aoba dang masü, saka Parliament nunga yanglutsü südi. Iba temzüng dak ajemdaker, yimtsüng kar nungbo kibongtem nung sarasadem akaba mapang nunga sünga azükba, ki rongdoktsüba aser mangsa yimdong nung maksüa jajadaksüba aika ajuruogo. 1999 nung Australia nung leprosy hospital nung doctor Graham Staines aser par chir ana gari nung mi senoka rongseta südaktsüba, ano 2008 küm Kandhamal nung Khristan tamanger 39 tepsetba, tenlaki 395 rongdoktsüba, 600 yimtsüng rongdoktsüba, 5600 ki-o-jen, dokan nungi oset-ts?set rakzüka bener aoba aser nisung merijang aika ki maka kümdaksüba atalokogo. Item ya asaa Khristan mekümdaksütsü? amokmerenba aser rishikangba lir ta metetdai. BJP yimsüsüba arur Muslim aser Khristan dak tashiyim amshia rishikangshibaji küm shia 800-1000 ka shibosa asür ta ashir. India nung BJP yimsüsüba arur religious mob kümteta, Government tazüokba kecha mali ama, Muslim aser Khristan attack süyonga senzür, khen khenbo tetsür dak tashiyim amshir tepseta yutsüba osang aika angur. Saka aiben Governmenti tenük amor yutsür. Ano tesüngmangtsükaji RSS and VHP telokibo India ajunga nung Ghar Wapsi, tetezü tanaben meyipa Hindu yimsü dangi anir aitba puja inyaka aoba angur. Ozüng balala ajanga aser tashiyim mapatem ajanga yamaji Khristan mekümdaksütsü nokdangar. Kechiba süra, India ya Hindu yimsü amanger lima ta angatetba ajanga yamaji ataloker.
- f) India ya Hindu lima aser yimden yimsüsürtemi Hindu yimsü kümzüka ayutsü noktaktertem ta sayua yimden tashi arakmoktsü asoshi Muslim ya tsükchir tulutiba amai kümdakja lir. Tatashim shia, India tesem balala nung, Hindu o Muslim na tsüngda communal tension adoktsüba ajangshia arur. Ayodhya nung Ram aso, anungji aji temeshi yimti lir. Yangji Hindu nung tekülem ki ka aliba raksatsür, Mughul yimsüsüba mapang Babri Masjid yanglu, anungji Hindu nung nem meyiptsütsüla aser yangji Hindu tekülem ki ka yanglutsü ta BJP sanen luden 1989 nung akangshia renemer, lenir L K. Advani lenisüba nung Hindu ajungmesotsü aser lungjemdaksütsü? atema Rath Yathra Somnath nungi Ayodhya tashi kilometre 10,000 September 25 nungi October 30, 1990 tashi, Ram asoba yimti nung tenlaki asütsü ta ayimokja jaja. Supreme Court-i temelaba magütsü saka Babri Masjid tepsaa endokogo. Alima dang India ya Hindu country tulutiba ka ta sayutsü atema, aser alima ajak nungi arua reprangdaksütsü, külemdaksütsü asoshi Ram tekülem ki yanglutsü apusoogo (shitak asü masüar Nagaland Govt.-ia tenla tulu agütsüba social media nungbo nguogo). Iba den Muslim nung madak tashiyim amshitsü, amokmerentsü asoshi nashi political symbol ka ama tamang yimsü den sendaktepa tsüngrem amai kümdaksür külen, nashi metepsettsü, nashi shi mayoktsü, machitsü ta state aika nung ozüng yanglu aser iba ozüng dak ajemdaker Muslim nung aika tepsetogo, aika dak zükogo. Yamaji state aika nung Muslim nung timtem ajuruba angur. Ano Muslim o Hindu na tsüngda kibalembu nokdangtsü atema "Love Jihad" ta, Muslim yimsü amangdaksütsü mechi kibong akümba ta aija rishikangshiba, tepsetba osang aika azünger. Item ajak ya Hindu Rashtra kümdaksütsü atema inyakba mapatem lir. Shiv Sena lenir Thackeray-i India lima Muslim nung yimjung nung linera, parnoki mapa asem inyaksüla (a) Hindu nungeri ama tetsür ka ka dang agitsüla aser tanur aika masotsü atema family planning amshitsüla (b) Nashi metepsettsüla ta Muslimi noktaksüla, aser (c) Hindu yimsü ya India nung tamangba yimsü ta agizüksüla.
- Yamaji Hindu yimsü media ajanga sangdongba, shisashiba azüoka ayuba, yoga, astrology, nashi ambulance a.a. jembiba mapang ka lir. Tamangba yimsü yamaji yimdeni amshir. Tzümetsüng tulu nungoka aitba ama "Hindu" No.1, tanga shilu, oshi, yimsü nungdak mali, anungji tashi mangartem merenshiang, rishikangshiang, rongdokjang, tepsetang ta Government tashi nung inyakba agi lokti yimden masüngtet jenjang ka nung lir ta kuli asür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir



June 17, 2022 nü Nigeria kübok Owo jila nung aliba St. Francis Arago Tenla kidang tepsetba Khristantem atema asüpila sentong agidang tangokba noksa nung angur.

June 28 nungi Intl' Religious Freedom Summit tenzüksü

Washington D.C, Aami/June 24, 2022 (Agencies): Mongolbarnü (June 28) Washington nung 2buba International Religious Freedom Summit tenzüksü lia meimchir temeden atema inyakertemi, alima nung tamangba yimsü temeden kümzüka ayuba tsütsü yaküm tayongzükba tulutiba ajurua liasü, ta metetdaksü.

Iba summit nung talisa tawa Nigeria nung Khristantem aika tepsetba, China nung Uyghur Muslim nungertem tepsetba, Burma nung Rohingya Muslim nungertem anema inyakba aser Europe tesem balala nung Yihuda nung anema inyakba atema jembitsü.

Iba sentong ayongzükertem aser shilem agitsüpertemi ashiba agi, tang alima nung tamangertem atema climate change ya tongtumbang onük ka kümogo.

Anogo asemnü senden nungji House Speaker Nancy Pelosi, California Democrat; U.S. Ambassador-at-Large for International Religious Freedom Rashad Hussain aser Enes Kanter nunger densema meimchir temeden atema inyaker aikati jembitsü.

Kasa senden nung Finland nung Evangelical Khristan, Päivi Räsänen-i jembitsü.

Ambassador aser taoba mapang international religious freedom nung US ketdangser, Sam Brownback-i, taruba senden nung tamangba yimsü temeden ya kanga tongtumbang onük ka asütsü, ta metetdaksü.

Interview ka nung jembidang Brownback-i, China-i Uyghur Muslim nungertem anema inyakba ya Uyghur Muslim samatsütsü nükjidong nung inyaker, ta alimai metetogo; Communist-i Muslim yimsü magizükteter, ta metetdaksü.

Paisa, "Ukraine tensa ajanga iba linük nungji religious freedom kongshio, item kuli kar jangjaogo saka ano aika mejangja," ta metetdaksü.

Alimai nung religious freedom atema maneni inyakdar; tangbo yimjak nung jakdaka inyaker aser nisung aikati iba jenjang angateta

kümogo, ta Brownback-i ashi. U.S. Commission on International Religious Freedom nung Chairman tasenba, Nury Turkel-i, IRF Summit ya kanga tongtumbang, aser iba senden nung linük security tsütsü nungi religious freedom jenjang repringshitsü imlar, ta metetdaksü.

Turkel-i, "Alima linüktemi kasa aibelen benshir, talisa yimsüsürtem aser democracy linüktemi maneni aibelener. Meimchir temeden anema inyakba aser yimsü nung ajemdaker reshikangshiba anema meimchirtemi inyaksü mapang tongogo," ta metetdaksü.

Meimchirtem anema inyaka nisung jenti metepsetdangyongi alimai ibaji nokdangtsü atema inyaksüla, ta paisa ashi.

"Iba sabang amshia ni official jenjang nung yimsüsürtem dang alima nung meimchir temeden anema inyakba mapatem aser yimsü nung ajemdaker reshikangshiba metetdaksütsü.

Talisa Nigeria aser India na atema tebilemstü kaa inyaksüla, iba denji külemi Europe nung Yihuda nung aser Muslim nung sempaba atema tebilemstü kaa inyaksüla, kechiyong Europe nung lenirtemi anapronglaji sendokogo," ta pai metetdaksü.

Turkel ya Uyghur nung lir aser pa United States nung jenoka liasü.

"Tamangba yimsü nung ajemdaker reshikangshiba yimya balaka anema alima linüktemi inyaker. Nisung jenti tepseter aser tangbo China-i ibaji ajungketstür," ta pai ashi.

"Tanü alima nung linük 80 dak temai China nung surveillance technology techniques amshir, aser itemji nübur temeden, yimsü temeden aser democratic inyakyim anema lir," ta pai ashi.

Kasa senden nung meimchir temeden atema inyaker aser taoba mapang USCIRF Chair, Katrina Lantos Swett-ia jembitsü.

2022-23 kümsük atema USCIRF Chair, Nury Turkel shimogo



United States Commission on International Religious Freedom (USCIRF) summit ka nung Nury Turkel-i jembidang tangokba noksa nung angur.

Washington D.C, June 24 (Agencies): 2022-23 kümsük atema United States Commission on International Religious Freedom (USCIRF) Chair, Nury Turkel shimogo, ta International Christian Concern (ICC)-i metetdaksü.

USCIRF nung Commissioner temi Chair

atema Turkel shima liasü. Turkel ya 2020 küm May ita nungi Commissioner inyaka arur aser pa leniba nung China nung Ughur Muslim nung jenti tepsetba anema inyaker.

USCIRF-isa Vice Chair menden atema Abraham Cooper shim. ICC Tir, Jeff King-i, "Tawa

ANO GO ABEN TSÜNGREM DEN

Ne Tenük Rangketa Yokang

- T. Ken 123:1-4

Ne tangatetba nung timtem lira, azüklen rangketa yoktsü merangnang. "Ne dangi kü tenük rangketa yoker, O na, shiba anüng tem nung alir" (t.1).

Kibuba dangi ne tenük rangketa yokba tetezü kechi ? Mezüngbuba, ibai Pa tematiba tashi ta metetba lir. Asenoki asen tenük temalen rangketa yoker kechiaser Pa asenok dang nungi temaba. Isaia pa tenük Tsüngrem chuba menden nung ranglok aser Tenla Kidang Pa temaba nung ajungketa angu (Isa.6:1). Pa tematiba master lir; asenok Pa kilirtem lir. Pa Teyanglur; asenok teyanglubatem lir. Pa kotaker Tebu; asenok Pa chirtem lir.

Asenoki Pa teperiba ta agizüker. "Ajiang, kilirtem tenük pei teka kibur teka repranga ali ama, kilitsürlai pei kiburla teka repranga aliba ama; yamaji onok tenük Kibuba asen Tsüngrem dang, Pai onok dak taochi maka tashi repranga alir" (t.2). Pa teperiba asü nung asenoki Pa dak repranger. Asen nungdak ajak Pai agütsütsü akoker. "Kü Tsüngremi Khrista Yisu nung Pa sentsüwangshi nung Pa rongsen yari nenok tenüngdaksü ajak agütsütsü" (Fil.4:19).

Tasembuba, kodang asenoki asen tenük Kibuba dak ranglokdir, asenoki Pa temoatsütem agizüker. "Onok dang aochiangma, O Kibuba, onok dang aochiangma," ta ken züluri tekong 3 nung sarasadem. Tsüngremji tagütsünü, tajung aser tabensa sempet agütsüba Tsüngrem lir. "Nenok mejungia, nenoki nenok chirtem nem sempet tajung agütsütsü metetra, nenok Kotaker Tebu shiba kotak nung lir Pa dang meshirtem nem Pai koda tajungba magütsütsü!" (Mathi 7:11).

Tanü nai temaba Tsüngrem metettang. Pai azüoker. Pa teperiba angatettang. Tanü na kechi nungdaker Pai agütsütsü akok. Pai agütsüba agizükang. Shirnoki parnok inyakba ajak nung Pa sentsüwangshidaksür,

maneni amalitepa inyaksü yongyar. Nisung ajaki pei tamangba yimsü sadoka amangettsü aser meimchir ajak temeden kümzüksü atema onoki maneni inyaksü," ta metetdaksü.

Turkel-i, "United States Commission on International Religious Freedom nung Chair shimba atema pelar. Tamangba yimsü temeden kümzüksü atema Commission lenitsü asoshi kü nem maangka agütsüba atema pelar. Vice Chair Cooper aser Commissioner tem den longjemer White House, State Department aser Congress dang USCIRF-i benokba mapatongtem mapa küma inyaksü atema mepishitsü," ta metetdaksü.

Turkel ya tang Hudson Institute nung inyaker aser Council on Foreign Relations nunga züngsem lir. Iba sabang amshia pai China nung Uyghur nung temeden ajungkettsütsü atema inyaker.

OLONG PAITEP # 6209

1		2		3		4		5		
										6
7	8									
			9		10		11		12	
13										
			14							
							15			
16		17			18	19				
				20				21		22
	23									

- TIPILEN**
- 2. Tzü atsügendendak - (8)
 - 7. O jembiba yimya - (3)
 - 9. Me _ _ _ ogo - (3)
 - 11. Sentong - (4)
 - 13. T _ _ _ _ r - (4)
 - 14. Odangba tasazük - (5)
 - 15. Ak chi asoba - (5)
 - 16. - (4)
 - 18. Tekara shiruru ka - (3)
 - 21. Maru tashi ali - (3)
 - 23. Anüung nung yimzüba - (8)


- LANGTSÜNGLEN**
- 1. Tetsü pok nungi alu - (3)
 - 2. Petinu tulutiba - (3)
 - 3. T _ _ _ _ P - (4)
 - 4. Shishilemba dang amshiba - (3)
 - 5. Na aser pa - (4)
 - 6. Taküm nung tajung-tamajung telemzük - (3)
 - 8. Sen tetemlok agiba - (6)
 - 9. Inyaksü tezüba masü - (5)
 - 10. Yiruba zübo - (5)
 - 11. Yimsüsür - (5)
 - 12. Takok atema agütsüba - (6)
 - 16. Sen yong agi - (3)
 - 17. Aiür asüba mapang - (4)
 - 19. _ _ _ _ -tsüset - (4)
 - 20. Tzüngluruba mapang - (3)
 - 21. Kiset shiruru ka - (3)
 - 22. Lir - (3)

OLONG PAITEP # 6208 TELANGZÜBA

- TIPILEN :**
- 1. Telok, 4. Aluru, 6. Ozüung, 8. Emk,
 - 9. Kin, 10. Teti, 12. Süir, 13. Jen,
 - 14. Ola, 16. Talak, 17. Mazük.

- LANGTSÜNGLEN :**
- 1. Tenükjang, 2. Luden, 3. Kiochtsü,
 - 5. Lenti, 7. Tajangzük, 11. Teronem,
 - 12. Sempa, 13. Jahaz.

Noksa nung meputepi aliba 10 bushiang



TANÜBO NAI LANGZÜANG

Q. Inter-State Council ya Indian Constitution indang _____ article kübok tenzuk.
 [A] Article 246 [B] Article 257
 [C] Article 263 [D] Article 267

_____ (Taruba adok nung onoki langzüksü)
YASHI ADOK TELANGZÜBA: End of Slavery

AO OSHI ANGAZÜKDAK:
TANÜ ANGAZÜKTSÜBA OJANG

Mongputeni
 (n) küm nung ita terbuba (October)
 * Küm shia tzüinglu Mongputeni ita tashi arur.

Mungsong
 (n) alu mang ka (a particular area of cultivation)
 * Küm shia yimertem alu achitsü atema yimteni mungsong lemsatsür.

NAI-A YA METETTER MA



1978 küm June 25 nü El Monumental, Buenos Aires nung Argentina aser Netherlands tsüingda FIFA World Cup Final asaya liasü. Iba match nung Argentina-i Netherlands madak goal 3-1 agi takok angu.

SUDOKU # 6247

7						1
		1 6 7				4
	9 5					
7	2			8 9		
6 4						
8						
2 3			1 5 7			
1	8 9					
5		2			6	

TELANGZÜBA # 6246

8	2	5	7	4	1	3	9	6
4	6	1	9	5	3	2	7	8
9	7	3	8	2	6	1	5	4
5	3	4	2	6	9	7	8	1
6	8	9	5	1	7	4	2	3
7	1	2	3	8	4	9	6	5
3	5	8	4	7	2	6	1	9
2	4	6	1	9	8	5	3	7
1	9	7	6	3	5	8	4	2

OJANG LUTEP # 5794

EANS	:										
TÜEIKTTENYSAM	:										
KANNGÜDAA	:										
UIEMY	:										
PAANMG	:										
HKITSA	:										
NNUG	:										
IEMJTI	:										
IONYAADKK	:										
JGBTUNAA	:										

OJANG LUTEP TELANGZÜBA # 57393

TANGAR TIMTEM MANGATET YUR TAPI AGI DANG JEMBIBAJI TIM MASÜ

TAN HOPTA ATEMA - KOMA SÜLA ?

Q. Nagaland nung nübortem ket nung arem shiruru aser ozüsangnu akhatsü ayuba prangpong ajak government ket nung ayu nunga koma süla ?

Tir election atema Droupadi Murmu-i nomination file süogo



June 24, 2022 nü Parliament House, New Delhi nung NDA nungi Tir candidate, Droupadi Murmu-i nomination file asüdang tangokba noksa nung angur. Kasa noksa nung Ato kilonser, Narendra Modi den Union Minister tem- Rajnath Singh, Amit Shah, Nitin Gadkari aser BJP National Tir, J P Nadda nungera angur.

New Delhi, Aami/June 24 (Agencies): Hokolbarnü BJP-i aniba National Democratic Alliance (NDA) nungi Tir candidate, Droupadi Murmu-i nomination file süogo.

Parliament House nung nomination file asüdang la den Ato kilonser, Narendra Modi, Union home minister Amit Shah, Uttar Pradesh Chief Minister Yogi Adityanath, Union minister tem aser BJP lenirtem Gen VK Singh (Retd), Bhupender Yadav aser Giriraj Singh aser BJD lenir Dr Sasmit Patra nungera liasü.

Nomination paper nung sign asürtem rongnung ato kilonser Narendra Modi, Rajnath Singh, Amit Shah aser BJP Tir, J P Nadda nungera lir.

Mongolbarnü BJP Parliamentary Board senden amenba sülen BJP National Tir, JP Nadda-i Tir election atema NDA candidate ji Murmu asütsü, ta sangdonga liasü.

Hokolbarnü nomination file

asütsü jakedang Droupadi Murmu-i opposition lenirtem- Sonia Gandhi, Mamata Banerjee aser Sharad Pawar nungera dang la pusemang, ta mepishia liasü.

Murmu ya March 2000 nungi May 2004 tzungda Odisha nung minister inyaka liasü. 2000 aser 2004 küm lai BJP ticket nungi toktepa Odisha kübok Rairangpur assembly constituency nungi takok angu.

La mezüng 2015 küm May ita nung Jharkhand nung tetsürtem rongnungi mezüng Angh shima liasü aser küm 6 tashi Angh inyak.

Hokolbarne Modi-i twitter ajanga, Murmu-i la taküm piyong lokti tenzüka aruba den sensakertem nem tashi agüja aruogo, anungji lai Tir junga inyaksü, ta metedakja liasü.

Murmu-i, la Odisha jala lir, anungji party balala süaka state nung party balala nungi MLA aser MP ajaki la yaritsü imlar,

ta ashi. "Ni ya Mayurbhanj district tezülen aliba tribal tsür ka lir, anungji linük nung temaba menden atema ni candidate asütsü ta ni imlaa maliasü," ta lai ashi.

Hokolbarnüsa lai defence minister Rajnath Singh, BJP Tir, JP Nadda aser linük tatong Tir, M Venkaiah Naidu densema lenirtem aika ajuruogo.

Odisha nung Naveen Patnaik'er party-ia la pusemsü, anungji Murmu-i vote shilem 52 (vote 10,86,431 nungi vote 5,67,000) angutsüa akok.

Ano külen Opposition party temi Tir election atema opposition candidate, taoba mapang Union minister Yashwant Sinha shimogo.

Nomination file asütsü atema tatembangbuba anogoji June 29 lir, July 18 nü election agitsü aser July 21 nü vote azüngba sülen osang sangdongtsü.

Tapan Kumar IB Director shim aser Iyer NITI Aayog CEO shim

New Delhi, Aami/June 24 (Agencies): Hokolbarnü India sorkari, Indian Police Service (IPS) officer Tapan Kumar Deka Intelligence Bureau (IB) nung Director kümsük küm ana atema shimmer, ta metetdaksü.

Deka-i Arvind Kumar melentsü, kechiyong Arvind kümsük June 30 nü tembangtsü.

Iba dak alia sorkari Indian Administrative Service (IAS) officer aser taoba mapang Drinking Water & Sanitation Secretary, Parameswaran Iyer NITI Aayog nung chief executive officer shimogo; pai

Amitabh Kant melenzüksü. Kant kümsük June 30 nü tembangtsü.

"Cabinet Appointments Committee-i kümsük küm ana atema Iyer shimmer. Amitabh Kant June 30 nü anisüngzüksü," ta ketdangsertemi metetdaksü.

2009 küm Iyer-i Indian Administrative Service nungi anisüngzüka liasü.

Ano külen Research & Analysis Wing (R&AW) nung tongti, Samant Kumar Goel maneni R&AW tongti inyaksü atema küm ka bendenloktsüogo.



June 24, 2022 nü Rwanda nung India External Affairs Minister, S Jaishankar-i Canada Foreign Minister, Mélanie Joly ajurudang tangokba noksa nung angur.

Wayanad nung Rahul indang office raksatsü; SFI züngsem 8 apu

Wayawand (Kerala), June 24 (Agencies): Hokolbarnü Kerala kübok Wayawand nung Students' Federation of India (SFI)-i longkak aita jajaba sülen Congress MP, Rahul Gandhi indang office raksatsü; iba tatalokba dak sendakba nung police-i SFI züngsem 8 puogo.

Longkak aiterem jagi office kakkoka aiba sülen office telung nung aliba osettsüset raksatsü.

Supreme Court-i eco-sensitive zone (ESZ) dak sendakba tetuyuba agütsüba anema Rahul-i kecha meinyakba atema SFI-i Rahul anema longkak ait.

Students' Federation of India (SFI) nungi züngsem 100 dak temai longkak aitba mapang nung indang office raksatsü aser iba dak sendakba nung parnok ti pua lir, ta police-i metetdaksü.

SC-i protected areas, wildlife sanctuaries aser national parks telungtet kilometre kaji eco-sensitive zone (ESZ) lir, ta

tetuyuba agüja liasü.

June 23 nü Rahul Gandhi-shidi ka ajanga Ato kilonser, Narendra Modi dang, SC tetuyuba ajanga Wayanad parliamentary constituency tesem ajaklen longkak aitar, ta metetdaksüogo.

Rahul Gandhi office raksatsüba dak sendakba nung Kerala Chief Minister, Pinarayi Vijayan-i, "Rahul Gandhi indang office raksatsübaji ni sashia aitsür. Iba lima nung longkak aitbaji democratic inyakyim nung asütsüla, ajisüaka iba tatalokba yabo democratic inyakyim alema liasü. Iba tatalokba nung shilem agia alirtem nem sorkari temerenshi tulu agütsütsü," ta metetdaksüogo.

Kerala nung, talisa Idukki, Wayanad, Kottayam aser Pathanamthitta district tem nung yimtenren party balala aser aluyimer telok balalai June 3 nü SC tetuyuba anema ola adokdar.



June 24, 2022 nü Bihar Vidhan Sabha, Patna nung Assembly senden mezüng anogo nung CPI MLA temi Agnipath scheme anema longkak aitba noksa nung angur.

GOVERNMENT OF NAGALAND
DIRECTORATE OF SCHOOL EDUCATION
KOHIMA : NAGALAND

NO: ED/AEI-25/2021 Kohima, the, 21st June 2022

NOTIFICATION ON NATIONAL AWARDS FOR TEACHERS

It is hereby notified for the information of all concerned that the 'National Awards For Teachers' web portal for online self-nomination by teachers, <http://nationalawardstoteachers.education.gov.in> is open from 01/06/2022 and the last date for submission of self-nomination by eligible teachers is 20/06/2022.

Conditions of Eligibility of Teachers for consideration for the Awards:

School Teachers and Heads of Schools working in recognized Primary/Middle/High/Higher Secondary Schools under the following categories:

- Schools run by State Govt./UTs Administration, schools run by local bodies, schools aided by State Govt. and UT Administration.
- Central Govt. Schools i.e. Kendriya Vidyalayas (KVs), Jawahar Navodaya Vidyalayas (JNVs), Sainik Schools run by Ministry of Defence (MoD), Schools run by Atomic Energy Education Society (AEES) and Eklaya Model Residential Schools (EMRS) run by Ministry of Tribal Affairs.
- Schools affiliated to Central Board of Secondary Education (CBSE) (other than those at (a) and (b) above)
- Schools affiliated to Council for Indian Schools Certificate Examination (CISCE) (Other than those at (a), (b) and (c) above).

NOTE:

- Retired teachers are not eligible for the award but those teachers who have served a part of the calendar year (at least for four months i.e. upto 30th April in the year to which National Awards relate) may be considered if they fulfil all other conditions.
- Educational Administrators, Inspectors of Education, and Staff of Training Institutes are not eligible for these awards.
- Teacher/Headmaster should not have indulged in tuitions.
- Only Regular Teachers and Heads of Schools are eligible.
- Contractual Teachers and Shiksha Mitras are not eligible.

Teachers who have contributed for the improvement of quality of education through their commitment and industry and also enriched the lives of their students are encouraged to submit self-nominations before the prescribed last date of submission. Further details may be obtained from the web portal mentioned above.

(THAVASEELAN K) IAS
Principal Director

Shireen Abu Akleh ya Israel nungeri khaset: UN



Geneva, Aami/June 24 (Agencies): United Nations ajanga Hokulbarnü ashiba agi, May 11 nü Al Jazeera TV journalist Shireen Abi Akleh khasetba injang ya Israel sepaitemi khaloktsü ta bushitet.

Palestinian-American osangbener Abu Akleh ya "Press" ta zülua aliba tulua ka aser helmet ka agir northern West Bank nung aliba Jenin camp nung May 11 nü Israel mitkar temi operation ka agiba indang osang abenba mapang khaseta liasü.

"Abu Akleh khasetba injang ya Israel security forces nungeri aru ta onoki ngutet," ta UN Human Rights Office indang odongtar Ravina Shamdasani-i Geneva nung osangbener dang ashi.

"Israel ketdangsür temi

mapa tamajung inyakba indang bushisüngdang masüba ya kanga tesasatsüka lir. UN Human Rights Office nung onoki iba tatalokba indang temeja asadangba tembangogo."

"Abu Akleh khasetba aser la den külemi inyaker Ali Sammoudi yirutsüba injang ya Israeli security forces nungeri aru aser prangbong bena aliba Palestine nungeri tapi agi akhaba nungeri masü, koba Israel ketdangsüri shia liasü," ta lai ashi.

Iba osang ya Israel mitkar aser Palestinian attorney general nungeri aru, ta lai ashi.

"Osangbener aliba anasa prangbong bena aliba Palestine nunger inyaksangshi aliba osang kecha onoki mongutet," ta Shamdasani-i ashi.

UN Human Rights Office ajanga noksa, video aser audio tem medemdang, lendong atalokba tesem semdang, mongintem den shisa agitep, ketdangsür osangtsüsang agitepba reprang aser tenük kuli alirtem den asüngdangya süa liasü.

Anepdang 6:00 ako sülen Jenin refugee camp anüolen tsütsüi osangbener tenet aru, ta bushiteta liasü.

Anepdang 6:30 ako meta osangbener pezü tesem ka leni ao, Israel security forces aliba tsütsü nungeri kanga junga tenük yoker akhaba ama injang kar parnok tsütsü khaloktsü.

"Injang ka agi Ali Sammoudi tapubang yirutsü aser ano injang kati Abu Akleh tekolak nung khashia la idangjisa asü."

US Senate nung prangbong azüoktsü bill agizükogo

Washington, Aami/June 24 (Agencies): US Senate nung prangbong azüoktsü bill ka agizükogo, koba küm 30 jungnüa nung prangbong atema ozüing yangluba tesashitaba alitsü.

Iba ozüing kübok lanurtemi prangbong aliba tesashiba miter aser state tem dang lendong ama züingshiba nisungtem dak nungeri prangbong agientsü ajungshir.

Prangbong azüoktsü asoshi party telemsa makai iba bill agizükba nung Republican telok nungeri ozüing yanglur 15 tashi Democrats den Senate nung dener iba bill ya agizük.

Ajisüaka lower house nungeri temelaba nüngdaker aser iba sülen ozüing kuma Tir Joe Biden-i meyongnem agütsütsü.

Democrat temi amokbanger aliba House of Representatives nung tekeratiba nung vote agiteptsü imlar.

Tiri aginüba dang nungeri tajemba süaka iba bill atema tekeratiba nung vote agiteptsü pai ajungshia liasü. Prangbong azüoktsü asoshi nokdaker aser Democrats timbai prangbong azüoktsü asoshi mera tesashiba aginer.

"Küm 28 tashi mapa mekumteti lia arur taonung Congress nung telok balala nungeri züingsemtem lungjemr linük tesem balala nung nüburttemi akhangba anga aser asen linük nung prangbong agi azüokshiba azüoktsü asoshi ozüing agizük," ta Biden-i ashi.

Taoba ita Buffalo, New York nung supermarket ka aser Uvalde, Texas nung aliba

primary school ka nung nisung 31 dak tema khaseter lia iba bill ya agizüker.

Iba ozüing kübok arishi küm 21 dang tajemba lanurtemi prangbong aliba mapang kanga junga asadangtsü, mental health programme aser school security tajungba kumdaktsütsü asoshi sorkari sen billon \$15 agütsütsü, timtem ama züingshiba nisungtem ket nungeri prangbong agientsü atema "red flag" ozüing amshitsü atena state tem ajungshitsü asoshi senotsü agütsütsü, kibong makum aliba tetong-teji merenshiba nung aija alirtem dang prangbong ayokba nokdangtsü asoshi "boyfriend loophole" nüngja agüja aliba shibangtsü.

Tir Biden-ibo Texas aser Buffalo mass shooting nung amshiba prangbong densema ayokba tenokdangba agütsütsü mesüra item prangbong alitsü asoshi arishi küm timba kumdaktsütsü molunga liasü. Tamalen nungu US nung prangbong azüoktsü ozüing yanglutsü merangba Republican party-i nokdanga aru.

Saka tangbo züingsem 100 aliba Senate nung vote 65-33 agi iba bill agizüka liasü.

Republican telok nungeri iba bill busema vote agütsür ya kar dak alaka timba taküm November ita election nung tokteptsü tebilemba mali ta shia lir.

United States nung tang prangbong million 393 nüburttem kabu nung alitsü südi, ta asadangteta lir.

European Union-i Ukraine nem candidate jenjang agütsüogogo

Brussels, Aami/June 24 (Agencies): European Union-i Ukraine ya EU züingsem akumtsü lenmang nung yutsütsü molungogo, anungji Russia nungeri tali piladakja aser West den tesendaktep tali akangshiba mera agir.

Brehostibarnü Brussels nung senden ka amendang European Union nung züingsem linük 27-i Ukraine candidate jenjang agütsütsü asoshi nüngdakba ama agizüka liasü. Ibaji ajanga züingsem akumtsü lenmang ka nung yutsür, saka züingsem akumtsü atema küm aika agitsü akok.

Russia Tir Vladimir Putin-i par sepai dang Ukraine nung 'special military operation' ka agitsü asoshi totuyuba agütsür ita pezü ajungtsü anogo ka lia iba mera ya agir.

Ukraine Tir Volodymyr Zelenskyy-i tweet ka nung tepela lemsatet aser "Ukraine tarutsü EU den lir," ta sangdonga liasü.

"Tanü ya Europe asoshi anogo tajung lir," ta European

Commission Tir Ursula von der Leyen-i Twitter nung ashi.

EU-isa ano linük tila, Moldova nema candidate jenjang agütsü, koba taoba mapang Soviet republic nung liasü aser Ukraine den arütsüa lir.

Moscow-i February 24 nungeri amak tenzüker hopta ka majungdang Ukraine-i European Union nung züingsem akumtsü asüngdanga liasü. Brehostibarnü

telemtetba agiba ama EU-i taoba mapang ilonga telemtetba agia mali aser parnoki meilongi iba tentet ulushir. Saka rara aser Ukraine-i tekeraba nung par linük asoshi inyaksü ajungshiba ajanga ilonga iba telemtetba ya agitsüsa akum.

European Union nung züingsem akumtsü atema rongsenketzung aser yimtenren tsütsü tenüngdangba tejanga aika lir, aser yangji ozüing shidak amshia yimsü asütsü aser danga democratic principles tem densema lir.

Ukraine-i sorkar ochimashi maparen azüoktsüla aser danga inyakyim nung asendenshi alitsüla.

Senden metenzükdang European Parliament-i Ukraine taginüba busema liasü aser EU sorkar temi menua melie iba maparen tenzüksü aser parnok akhi mapang nungeri tangatetba tajung nung aruba ama alitsü ayongzüka pangzüng ka agizüka liasü.

Ukraine-i Russia den raraba nung EU linüktemi lungjemr senotsü aser nok-nü agi Ukraine yaria arur aser Kremlin anema rongsenketzung tsütsü tenokdangba tesashi aser balala agüja lir.

EU candidate jenjang aliba ajanga block nung pasasa adentsü temelaba magütsür aser security tsütsü ilonga teyari magütsür.

Linük ka iba bloc nung züingsem akumba sülenbo EU treaty clause küboki aiter, kong züingsem ka dak dangari timtem agütsüra danga EU linük temi tashi ajak amshia

yaritsü shia lir.

EU züingsem tajangzükl tulutiba ya rongsenketzung lir, kechiaser parnoki nisung million 450 aliba market nung mapa inyaker, osettsüset, services aser senotsü angati aser sadoksayima jasadaktsür.

Ukraine ya mapang talangka nungeri NATO nung züingsem kumnüa aru, saka iba military alliance nung tangbo züingsem mekumtetsü, kechiaser sorkar inyakyim nung ochimashi, linük defence establishment nung metokmeperi aser arütsülen mangatetep lir.

Rara metenzükdang Putin-i Ukraine ya kodanga NATO nung medendaktsütsü khanga liasü.

Saka ita tetenzüklen EU tsütsüi Ukraine aotsü temolungtetba aliba ajanga pa nem timtem magütsü aser iba ya mitkar tsütsü tesendaktep ka masünung yangji tai aputsü kecha mali, ta ashi.

European Union lenirtemisa ano taoba mapang Soviet republic nung züingsem aliba

Georgia linük ya 'European perspective' ka ama agizüktsü molungtepa liasü.

Tongtipang teinyaktsütem inyakba sülen EU-i par candidate jenjang agizüktsü renema alitsü, ta European Council Tir Charles Michel-i ashi.

Poland Ato Kilonser Mateusz Morawiecki ya mapang talangka nungeri European Union nung Ukraine züingsem akumtsü busema arua liasü aser pai Twitter nung, "Europe telongjem asoshi ibai mapang tajung lir. Temeden asoshi timtemba maneni alitsü," ta zülua liasü.

Iba bloc nungeri United Kingdom ainshiba aser migration teblemstü amala agi EU anakshija liasü, saka iba tentet ya tang tashi kanga nüngtugu lir.

Ajisüaka tenokdangba balala agütsüba mechi Russia-i gas agütsüba ajemba ajanga energy tsütsü timtem ajuruba aser osettsüset nung jenjang atuba ajanga nüburttem jashiteper.

Mr & Miss Mega Model Hunt nung Advisor Nicky Kire adentsü



Dimapur, Aami/June 24, 2022 (TYO): Honibarnü (25.06.2022) RCEMPA, Jotsoma nung Nagaland Mr & Miss Mega Model Hunt, season 2 - grand finale sentong ayongzüksü terenemba lir. Iba sentong nung alakteta tejaoker ama Advisor, Urban & Municipal Affairs, Dr. Nicky Kire adentsü, ta sangdong ka ajanga metetdaksü.

sentong nung Colonel Umesh Chandra Sati, 1st Assam Rifles Kohima jaoka lir. Nagaland Mega Entertainment ajanga iba sentong ayongzüksü.

Nagaland Mr & Miss Mega Model Hunt, season 2 - grand finale sentong nung jury rongnung Imlibenla Wati Neinu, Seyievino Chuzo aser Ravi Ranjan Kumar, Director of Mr & Miss India Globe) dena lir. Sub Inspector, Fire &

Emergency Services, Kohima, Yimlei Phom-i iba sentong atema senotsü teyari agütsütsü. Aboli Chikhe-i iba sentong ketdangsüa agitsü aser Auden Lama show director asütsü.

Ticket alia alir ajak atema Razhu Point aser PHQ Junction nungi angati bus service angutsü. Iba sentong nikongdang 5:30 ako nungi tenzüksü, ta sentong achaayangertemi metetdaksü.

RKS, Tuli nung Drama Workshop agiogo



Dimapur, Aami/June 24, 2022 (TYO): Rajeshwari Karuna School Tuli nung April 25 nungi May 15, 2022 tashi school nung anogo 20 Drama Workshop ayongzük. Iba den külemi, school-i June 21, 2022 anogo "Why Always Me" omen nung ajemdaker Mega finale sentong ka agia liasü.

Actor (Rajeshwari Karuna School Tuli kaketshirtem) temi iba jilushi atema dialogue tem purapitet aser parnoki original ken ana tena liasü.

Iba jilushi sayuba dak alaka, kaketshirtemi ken atenba den shilem balala agiogo.

Iba Drama Workshop sentong nung National School of Drama, Tripura alumni, Hill Theatre co-founder aser theatre & films luyim nung Director/

Actor Kilangtemsü Imsong aser pa den külemi inyaker Mapulemba na shisalen sayur ama dena liasü.

Hopta asem tashi agiba Workshop sentong nung dramatic tools balala amshia aser sensaksemba ajanga creative drama tsütsü sempet tajung alir kaketshir 21 tashi metetpeladaksü. Iba sentong nung tsüraburtem aser temulungertem aruagi denogo.

Longleng nung Cataract Surgery Eye Camp agiogo



Longleng, Aami/June 24, 2022 (TYO): District Health Society, Longleng-i June 20 nungi 24, 2022 tashi District Hospital, Longleng nung "Free Cataract Surgery Eye Camp" ayongzük. National Program For Control of Blindness aser Visual Impairment Nagaland ajanga iba camp atema senotsü teyari agüja liasü, ta sangdong

ka ajanga metetdaksü. Iba Camp nung patient 39 tashi angati cataract eye surgery agiogo. Kasa mapang patient kar minor eye surgery agia liasü.

Free Cataract Surgery Eye Camp nung Dr. Innapokim Sr. Eye specialist District Hospital Tuensang, Dr. Renjano Jr. Eye specialist IMDH Mokokchung,

Medemnochetla, Staff Nurse, IMDH Mokokchung, Temjenkala, ANM IMDH Mokokchung, Takunaro Civil Attendant IMDH Mokokchung, LechuIralu, Ophthalmic Assistant NPCB aser VI Directorate, I. TochiImlong Ophthalmic Assistant CHC longkhim nungeri patient tem repringo, ta kasa sangdong ajanga ashi.

MULUNG NEN O



ASO :
11.03.1929

ASÜ :
18.06.2022

Onoki teti meima aliba tsürabur asür **S. Tsuknungchila** (Yajang 'C'), shiranga alidang nungi tasü nü tashi kija, kibong aser telok balala, ana aser talang nungi arua nübo, rongsen aser sarasadem agi nungita yaritepba asoshi nenok ajak dangi tsüngdong tonga marutetaka asür kinunger tenüng nung iba sapang nungi pelaba lemsateper. Temoatsür Tsüngremi nenok ajak maneni moajangma ta ozü tamang sarasadem.

*Tetidang meima aliba
Chirnurtem, Semchirtem, Kinungertem aser Sosemtem.*

MULUNG NEN O



ASO :
01-06-1974

ASÜ :
19-06-2022

Kinunger ajak khunendong **Wabong Mokoktoshi Pongener** (Chuchuyimlang) anojungi ali wadang tembang nung jenokdak maka ama aoksatepdang, nenok mapa tajung, teyaritep aser sarasadem agi onok süneptsür, aser item mapa tajung onok mulungjang nung teti alitsü. Tajung Tsüngremi nenok mapa tajung maneni mojangma.

Temeim Kinungtsü, Tsürabur aser Kinungertem

MABENSABA KA ABENSADAKTSÜR

MAY 14 & 15, 2022 Khar Laishir Silver Jubilee Souvenir Kaket page 17 nung Khar Laishir rong nungi mezünpurtem tarensen agütsüba nung Khar Laishir tetsürtem rong nungi mezüng BD & M.Th ji Mrs. Takosenla Walling Alitsü.

Sd/-
**Esther
Tongti Tezülur**

Sd/-
**Arenkaba
Tir**



Kentener aser ken zülur Alobo Naga-i Kr. Temsu Clover nem award agütsüba noksa nung angur. June 18, 2022 anogo RCEMPA, Jotsoma nung MG Music Awards 2022 sentong agiba mapang 'Best Indie Artist' award anguba atema DKSU-i Kr. Temsu Clover (Temsukala Lemtur) nem tenüngsang agütsür.

'9-KT' aser '15-SA-II' A/Cs nati NDPP Kohima Inter A/C sports meet kokogo



Men's football final match asyartem den tongtibang nisungtem aser NDPP Kohima Region ketdangsurtem külemi tangokba noksa nung angur.

Kohima, Aami/June 24, 2022 (TYO): 9-Kohima Town Assembly Constituency (A/C) aser 15-Southern Angami-II A/C nati National Democratic Progressive Party (NDPP) Kohima Region Inter A/C sports meet - men's football aser women's volleyball asayamung kokogo. Honibarnü Indira Gandhi Stadium Kohima nung NDPP Kohima Region Inter A/C sports meet asaya liasü, ta sangdong ka ajanga metetdaksü.

Football final match nung 9-Kohima Town A/C-i goal 3-0 agi Chief Minister's XI tsükdaksü.

Iba match nung, 9-Kohima Town atema Mupili-i mezüng goal inoktsü aser Metekhrielie Mejura-i tanabuba goal inoktsür sülen mezüng half tembangadok. Break sülen, tanabuba half nung Bokavi-i goal tasembuba bendenlokja 9-Kohima Town puri iba match koktet. Football nung takoker team (9-Kohima Town) nem senpet 50,000 aser runners-up Chief Minister's XI nem senpet 35,000 agütsü.

Final tongtettsü asoshi, mezüng match nung 9th Kohima Town-i 8th Western Angami A/C madak goal 7-0 agi

takok angu. Iba match nung Metekhrielie aser Mupili nati goal anana inoktsü. Tena den yarisema captain Krodiho, Hoinato aser Atoulie nungeri goal ka ka bendenlokja liasü.

Semi-final nung 9th Kohima Town-i goal 6-0 agi 10th Northern Angami-I A/C tsükdaksü. Iba match nung Metekhrielie-i hat-trick ka angu. Kasa match nung Hokato, Hoinato aser Onen nungeri goal ka ka idaktsü.

NDPP 9-Kohima Town A/C working president aser Southern Angami Youth Organisation president, Metekhrieli Mejura-i asaya asem nung hat-trick ka densema goal 6 inoktsü aser iba asayamung nung goal timtiba idaktsür rongnung pa liasü.

CM XI team pur mezüng match nung 11-Northern Angami-II A/C den asaya liasü aser parnoki goal 2-0 agi 11-Northern Angami-II A/C tsükdaksü. CM XI team atema Sinilo-i goal anaprongla idaktsü.

Semi final nung, CM XI team-i 14-Southern Angami-I A/C madak goal 1-0 agi takok angu. Iba match nung Advisor for Technical Education & Elections Medo Yhokha-i goal ka inokja liasü, saka pa

terberem yiruba ajanga asayamung nungi tukadok.

Kasa asayamung women's volleyball final match nung 15-SA-II puri 14-SA-I tsükdaksü. Iba match takok angur team 15-SA-II nem senpet 30,000 aser runners-up 14-SA-I nem senpet 20,000 agütsü.

Maneni, iba asayamung shibangba sentong nung Advisor for Excise, Sericulture & Minority Affairs Zhaleo Rio dena liasü. Rio-i ashiba agi, Naga nungeri saisapong jangrar, saka national aser international sabang tongtetta asayatsü asoshi asayar takotet aika mali.

Rural Development, Minister, Metsubo Jamir-i, iba amala asayamung ayongzükba ajanga party nung telongjem idaktsütsü, ta ashi.

Advisor for Urban Development & Municipal Affairs, Dr Neikiesalie Kire-i, taruba election tatonger asünung, kati ka tajungba angatetsü aser longjemtsü asoshi iba ama asayamung ya maongka tajung lir, ta ashi.

Tesendaktep tajungba yanglutsü asoshi tarutsü nunga iba ama asayamung ayongzüktsüla, ta Kire-i lemsatet.

September 15 tashi nung AIFF pur election agitsüla: FIFA

Mumbai, Aami/June 24, 2022 (Agencies):

Tenokdangba paidoktsü mechi September 15, 2022 tashi nung constitution melenshitsu aser office ketdangpur tasen shimtsü asoshi football achaayangba tentet, FIFA-i India's football association dang shiogo, ta ketdangsurtemi ashi.

Latetja aliba mapang shitak nung election magiba aser national sports code ajanga tuyuba nung anidaka temzüngtem mapa küma meinyaktetba sülen, taoba ita India nung court tematiba - Supreme Court ajanga All India Football Federation (AIFF) executive committee anenja liasü.

Iba sülen, AIFF achaayangtsü, AIFF indang constitution melenshitsu aser ita 18 tashi magii aruba election agitsü atema Court-i züngsem asem committee ka shim.

Federation nung züngsema alirtem pei linük nung kensüh-osüh mesüra yimtenren nungi pila alitsüla ta FIFA temzüng nung shia lir aser taoba mapang

nunga iba amala ken o dak sendakba nung tanga national association tem anenja/agiena lir.

Sports Minister, Anurag Thakur densema Indian football stakeholder tem den ajuruteptsü mechi anogo asem atema FIFA aser Asian Football Confederation nati AFC General Secretary Windsor John akhüm nung team ka yoka liasü. Iba senden Brehostibarnü tembang.

"Iba senden nung, FIFA/AFC tasa nung anidaka AIFF temzüngtem asadangshitsu asoshi meratem agitsü aser taruba AIFF lenirtem shimtsü asoshi election agitsü atema bangjemtep," ta AFC-i ashi.

"AIFF stakeholders ajanga renemba mapang nung ajemdaker item mera agitsü," ta AFC-i ashi.

Twitter nung Delhi FA, Chief aser taoba mapang FIFA regional development officer, Shaji Prabhakaran-i, July 31, 2022 tashi nung temzüngtem melenshitsu aser September 15, 2022 tashi nung election

inyakyim tembangtsü asoshi AIFF nem anogo atakzükja lir, ta ashi.

"FIFA-AFC delegation ajanga asenok (AIFF) nem mapang tatakzük agüja lir. Anungji, FIFA nungi tenokdangba paidoktsü asoshi asenok inyakyim dak tuluka keta lir," ta Shaji-i shisem.

FIFA ajanga AIFF nokdangra, October ita Under-17 Women's World Cup ayongzüktsü asoshi India-i 'hosting rights' mangutsü.

FIFA Council member Praful Patel-i anir AIFF elections ya 2020 küm December ita agitsü renem, saka AIFF constitution melenshitsu asoshi telemtetba kecha magitetba yong iba election thinena aru.

Cricket sapuba linük - India ya football wadang nung alimai jangjatetsüsa imlaba ama jenjang tajung ajangzükta mali aser nütsüng yongsük billion 1.3 shi aliba linük yagi World Cup asayamung nung khen danga asayadanga mali.

Tests aser ODI asayar atema contract balala agütsütsü: PCB

Islamabad, Aami/June 24, 2022 (Agencies): Red aser white-ball cricket atema Pakistan Cricket Board (PCB)-i central contract balala agütsütsü. Iba ama inyakyim ya PCB putiotsü nung mezüng asütsü.

Ajisüaka, PCB-i asayar tajungtem (elite players) bendanger league nung masayadaksüner aser iba atema board-i parnok nem temenok agütsütsü renema lir.

PCB-i ashiba agi, fiscal year 2022-23 atema Board of Governors-i annual budget - 15 billion rupees den cricket inyakyimtem atema shilem 78 agütsütsü melaogo.

"Asayar tajungtem ajungmesotsü aser tanga linük nung cricket asyartem nem lemezüktsüba taa den meneptepa agütsütsü nükjidong yur, men's central contracts' inyakyim melenhshitsu asoshi BoG-i melaogo," ta PCB-i ashi.

July 01, 2022 nungi retainer timba akümba den 'red aser white-ball' contracts balala agütsütsü. Centrally contract asyartem 20 nungi 33 tashi timba kümogo.

Board-i format ajunga nung match fee shilem 10 timba tutsütsü aser 'non-playing members' atema match fee ajunga indang nung shilem 50 nungi shilem 70 tutsütsü ta sangdongogo.

Team nung khuret/maparen talila benoka inyakba atema team lenir nem temenok agütsütsü mechi captaincy allowance agütsütsü.

Lahore nung media conference agiba mapang PCB Chairman, Ramiz Rajai, tang tasayadak alir asyartem, shirnok bendanger league nung asayatsü atema offer angur, parnok nem 'special fund' ka agütsütsü asoshi Board-i telemtetba agiogo, ta metetdaksü.

"Onoki asayar tajungtem talila off-season asayamung balala nung shilem magidaksüner. Item league nung parnok (asayar tajungtem) masaya tajungba ta onoki bilemer. Nüngdakba mapang, onoki parnok nem contract taa indang shilem 50 nungi 60 tashi agütsütsü," ta Ramiz-i ashi.

"Onok atema iba season ya kanga dang tongtibang lir. Asyartem yiruba mesüra

anibelemba timtem melidaktsüner. Koba asayamung süaka linük atema tajungba asayatsü asoshi parnok renema lidaktsüner," ta Ramiz-i ashi.

Category ajak nung 'women's central contracts' retainer shilem 15 timba kümtsüogo. Iba den bendenloksema women's centrally contracted players indang pool ya asayar 20 nungi 25 tashi timba kümtsütsü akok, ta Ramiz-isa jangjatsü.

"2021 September nungi cricket asaya format ajunga nung Pakistan men's cricket team-i shilem 75 shi takok nguogo, koba Test asayamung nung shilem agiba linük tem dang nungi timba asütsü. Ibaji ajanga rankings nung Pakistan jenjang tajungba küma, Test nung jenjang pungobuba, ODIs nung jenjang tasembuba aser T20Is nung jenjang tasembuba tongtetta lir," ta Ramiz-i ashi.

Red aser white-ball contacts balala lemsaba dak sendakba nung, Ramiz-i ashiba agi, iba saisapong aniba aser renloka aoba asadanga white-ball cricket tali jangjatetsü asoshi iba mera agir.

"World Cup ana densema taruba ita 16 nung onoki (Pakistan) international asayamung pezü asayatsü. White-ball asayar takotet nem contract agütsüba ajanga squad ana yanglutsü asoshi nungitsü, kong asyartem tajungba renemshitsu asoshi white aser red-ball cricket nung parnoki mapang shia shilem agitettsü. Iba den külemi, alima dang cricket sempet sayutsü asoshi maongka tulu angutsü," ta pai ashi.

Cricket asayatsü sempet tajung alirtem jangjatetsü asoshi Pakistan-i inyakdar aser iba asalentong ajanga international events/series atema India aser England team ama mapang ka nung red aser white ball atema squad ana lemsar asayatetsü, ta taoba mapang Pakistan Cricket captain, Ramiz-i ashi.

Cricket asaya nungi anener alir asyartem, match officials, scorers aser ground staff tem shirnok senotsü nung timtem ajurur, parnok nem teyari agütsütsü asoshi Pakistan Cricket Foundation ya tenzük, ta Ramiz-i ashi.

BILEMDANGANG

"Junga meshisadangi tenzükra tatem nung takok tajung mangutsü."